





武門  
卷  
15



孫真人千金方衍義卷十

長洲張璐路玉著

南沙席世臣郢客校

傷寒方下 凡七類

傷寒雜治第十

論一首 灸法一首

方五十一首

論曰凡除熱解毒無過苦酢等物故多用苦參青葙  
艾梔子葶藶苦酒烏梅之屬是其要也夫熱盛非苦  
酢物不解也熱在身中既不時治治之又不用苦酢  
等藥此如救火不以水也必不可得脫免也又曰今  
諸療多用辛甘薑桂人參之屬此皆貴價難得常有





此行求之轉以失時而苦參葶藶青箱艾之屬所在  
盡有除熱解毒最良勝於向之貴價藥也前後數參  
並用之得病內熱者不必按藥次也便以青箱苦參  
艾苦酒療之但稍與促其間無不解也  
扁鵲曰病在腠理湯熨之所及病在血脉鍼石之所  
及病在骨髓無可奈何而凡醫治病或言且待使病  
成乃頓去之此為妄矣當預約束家中及所部曲具  
語解此意使有病者知之為要

治溫氣病欲死方

苦參一兩以酒二升煮取一升盡飲之當吐則

除諸毒病服之覆取汗皆愈張文仲及肘後云  
治熱毒氣死破棺

千金湯

苦參湯 治熱病五六日已上方

苦參 三兩

黃芩 二兩

生地黄 八兩

右三味欸咀以水八升煎取二升適寒溫服一升

日再

衍義傷寒溫病截然兩途凡醫但見壯熱頭疼槩行發

散信手殺人曷知溫病是久伏少陰之邪得春時  
溫暖之氣蘊化濕熱從內發外故用苦參搜逐腎  
家久伏之邪取其苦燥濕寒除熱借酒引之上涌



吐中便具發散之義 若五六日後熱交營分徹  
外壯熱卽加生地以清血脈之邪黃芩以泄肌表  
之熱較之初發淺深不同又非一味苦參可治也  
凝雪湯 治時行毒病七八日熱積聚胸中煩亂  
欲死起死人搗湯方

芫花一升以水三升煮取一升半漬故布薄胸  
上不過三薄熱卽除當溫暖四肢護厥逆也

衍義芫花消痰飲水腫之專藥本經治咳逆上氣喉鳴  
咽腫千金取治時行毒病用水煎漬布取以攻發  
濕熱之毒也

栝蘘湯 治傷寒中風五六日已上但胸中煩乾

嘔方

栝蘘實 一枚

黃芩

甘艸 各三兩

生薑 四兩

大棗 十二枚

柴胡 八兩

右六味咬咀以水一斗二升煮取五升絞去滓適  
寒溫服一升日二

衍義於小柴胡方中除去半夏人參加入栝蘘治少陽

乾嘔煩渴

蘆根飲子 治傷寒後嘔噦反胃及乾嘔不下食

方



生薑 三兩

生薑根 切

青竹茹 各一升

粳米 三合

右四味以水七升先煮千里鞋底一隻取五升澄清下藥煮取二升半隨便飲不瘥重作取瘥

治傷寒後嘔噦方

通艸 三兩

生薑根 切一升

橘皮 一兩

粳米 三合

右四味咬咀以水五升煮取一升隨便稍飲不瘥更作取瘥止

衍義

金匱治胃熱噦逆乾嘔無如橘皮竹茹生薑等味

千金乃於橘皮竹茹湯中採取竹茹生薑清理胃

中痰逆配入蘆根滌除胃熱粳米以安胃氣也

次方但採橘皮順氣滌痰參入通艸上通陽明逆

氣使之下通仍賴蘆根粳米滌熱安中之力

治傷寒後虛羸少氣嘔吐方

石膏

麥冬

半夏 各一升

竹葉 一把

人參 一兩

右五味咬咀以水一斗煮取六升去滓內粳米一升米熟湯成飲一升日三服 一方加生薑五兩

此方是仲景竹葉湯方前卷汗後門中已有但少甘艸分兩不別



衍義此即前竹葉湯去甘艸衍義見前

治熱毒攻手足赤腫焮熱疼腫痛欲脫方

煮馬屎與羊屎汁漬之日三度

又方

濃煮虎杖根適寒温以漬手足令至踝上一尺

止

又方

稻穰灰汁漬之

又方

取好酒煮苦參漬之

又方

取猪膏和羊屎塗之亦佳

又方

取常思艸絞取汁漬之

衍義

手足赤腫熱攻四末故以四足獸屎汁漬之散邪

毒和血脈也 虎杖性善通利煮汁漬手足亦取

破血利水之功 稻穰灰汁專於滌垢亦能散血

酒煮苦參服之專祛温毒漬之亦能解熱 猪

膏和羊屎塗熱腫痛處即前馬羊屎汁漬之變法

取蒼耳治四肢拘攣脚膝疼痛以其能去風濕毒



邪也

漏蘆連翹湯 治時行熱毒變作赤色癰疽丹疹

熱毒赤腫赤痛生障翳方

漏蘆 連翹 黃芩

麻黃 白朮 升麻

甘艸各一兩 枳實 大黃各三兩

右九味咬咀以水九升煮取三升分三服相去如人行五里久更服熱盛者可加芫硝二兩

衍義時行熱毒雖熾發於外而毒尚根於內故用麻黃

義升麻開泄既發之毒枳實大黃攻逐未盡之邪麻

黃升麻得漏蘆連翹黃芩利竅解毒清熱之品則

無助虐熾腫之虞枳實大黃得白朮甘艸攝津禦

毒之味則有匡正辟邪之勣其配合之奧未許拘

執藥性者之妄行推測也

猪膽湯 治傷寒五六日斑出方

猪膽 苦酒各三合 雞子一枚

右三味合煎三沸强者盡服之羸者須煎六七沸

分爲二服汗出即愈

衍義發斑而用猪膽苦酒雞子必陽毒陷於陰分而見

咽痛之故若邪在陽分正當助其熾發必無酸收



之理方中猪膽瀉肝火苦酒收陰氣雞子潤咽痛服之使嘔鼓毒發於陽分汗出則愈乃長沙少陰例中苦酒湯之變法以補長沙之未逮

治人及六畜時氣熱病豌豆瘡方

濃煮黍穰汁洗之一莖是稌穰即不瘡瘡若黑

者搗蒜封之

又方

煮芸薹洗之

治熱病後豌豆瘡方

黃連三兩以水二升煮取八合頓服之

又方

真波斯青黛大如棗水服之瘡

又方

青木香二兩以水三升煮取一升頓服之愈

又方

小豆末雞子白和傅之

衍義

黍乃小米之粘者產於北方故其穰可除濕熱豌豆瘡之毒滌是高梁與黍不類恐人誤用故以此

辨若色黑為血滯取蒜搗封辛以散之也芸

薹破血潤燥能治遊風豌豆瘡亦得療之黃連



苦燥專治濕熱之毒 青黛清熱解毒溫熱陽毒

發斑咽痛咸可取用不特治熱病後豌豆瘡也

青木香入足少陰善降陰氣上逆并治癰腫痰結

氣凝諸痛 羊脂溫散濕熱毒氣摩傳以散皮肌

中血滯 赤小豆雞子白同散血解毒也

木香湯 治瘡煩疼者方

青木香 二兩 薰陸香 二兩 礬石 二兩

丁香 各一兩 麝香 半兩

右五味咬咀以水四升煮取一升半再服熱毒盛者加犀角一兩無犀角以升麻代之病輕者去礬

石神驗

又方

苾硝和豬脂塗上勿動痂落無痕仍臥黃土末  
上良此病小便澀有血者內壞瘡皆黑厲不出  
膿者死不治也

治內發瘡盛方

酢 四合 大豬膽 一具

右二味合煎三沸服一合日五服之良

治豌豆瘡初發覺欲作者方

煮大黃五兩服之愈



治時行病發瘡方

取好蜜遍身摩瘡上亦可以蜜煎升麻摩之并數數食之

衍義

青木香湯中乳香和血止痛礬石收濕除惡瘡熱毒丁香解結氣麝香利諸竅用治煩疼專通鬱閉熱毒也 芫硝和猪膽塗專解熱毒仍臥黃土取收濕氣若便澇有血是津血內竭黑靨是血氣外槁必死何疑 苦酒猪膽即前猪膽湯少雞子單用大黃與前單用黃連一意彼取燥濕此主滲熱 蜜能解毒摩瘡潤燥取以止痛煎同升麻

取散火也

又方

灸兩手腕腕子骨尖上三壯男左女右

治傷寒鼻衄肺間有餘熱故也熱因血自上不止

又用此方

牡蠣二兩半石膏一兩六銖

右二味治下篩酒服方寸七日三四亦可蜜丸如

梧子大用治大病瘥後小勞便鼻衄者

衍義

肺間餘熱熱邪原不為盛也故用牡蠣之鹹寒降泄石膏之辛涼化熱設熱邪勢盛詎可用牡蠣收



瀼乎

治傷寒熱病喉中痛閉塞不通方

生烏扇一斤切 猪脂一斤

右二味合煎藥成去滓取如半雞子大薄綿裹之內喉中稍稍咽之取瘥

又方

升麻

芍藥

羚羊角各三兩

通艸四兩

射干二兩

生蘆根切一升

右六味咬咀以水七升煮取二升半分作三服

衍義喉痛閉塞不通乃熱毒上炎故用射干之苦寒專

攻咽喉結痛猪脂以潤少陰之熱結也 射干為

咽痛專藥設用之不應則加升麻以散火芍藥以

收陰羚羊以破結通艸以泄熱蘆根以解毒并佐

射干之力也

治熱病口中苦下氣除熱喉中鳴煎方

石膏半升 蜜一升

右二味以水三升先煮石膏取二升次內蜜復煎取如飴含如棗核許烱盡復含之大良

衍義石膏化熱得蜜之甘以緩之

治傷寒熱病後口乾喜唾咽痛方



大棗

二十枚

烏梅

十枚

右二味合搗蜜和含如杏核大咽其汁甚驗

衍義

大棗甘緩得梅之酸以收之

赤石脂禹餘糧湯

傷寒服湯藥而下利不止心

下痞堅服瀉心湯竟復以他藥下之利不止醫

以理中與之利益甚理中治中焦此利在下焦

治之方

禹餘糧

赤石脂

各一斤碎

右二味以水六升煮取二升分三服復利不止者

當利其小便

衍義

傷寒誤下利不止心下痞堅與理中利益甚此下

焦虛脫故用赤石脂禹餘糧固鎮其下則中土自

寧心下之痞自開較之桃花湯其力倍專瀉因瀉

用之妙無逾於此 此方傷寒論列之甘艸瀉心

湯下瀉心湯專為胃中空虛客氣上逆心下痞鞭

而設若果胃中空虛與理中湯痞當開矣服之利

反益甚知利不在中焦而在下焦下焦乃腎氣所

司腎虛不能固蟄封藏非甘溫不能固脫故長沙

但取二味直達下焦以取專功倘服之利復不止

又當五苓利其水道以滲水實脾為務也 或心



下痞鞭滿引脇下痛乾嘔短氣汗出不惡寒此飲  
在脇下而痞又屬十棗湯證則與此湯無涉也

治傷寒後下利膿血方

阿膠 一兩

黃蘗 二兩

黃連 四兩

梔子

十四枚

右四味咬咀以水六升煮取二升去滓內阿膠更

煎令消分為三服

甲乙方無黃蘗有黃芩

衍義

少陰病得之二三日以上心煩不得臥用黃連阿

膠湯此治傷寒後下利膿血故於黃連阿膠湯中

除去芍藥雞子黃用黃蘗佐黃連以堅腸胃梔子

佐阿膠以清氣血不使隨火下奔殊非舊有微澹

腎氣本虛之謂

治赤白下膿小兒得之二日皆死此有蠱蟲在下

部方

麝香

礬石

巴豆

附子

真珠

雄黃 等分

右六味治合取桑條如箭幹長三寸以綿纏頭二

寸唾濡綿展取藥著綿上內穀道中半日復易之

日再神效

衍義

蠱本濕熱所化治用雄黃化蠱為主兼礬石收濕



巴豆殺蟲麝香辟惡真珠解毒用附子者不但取其破除結積并取其烈以化下濕生蟲譬如杲日當空陰類皆滅迹矣

麻黃升麻湯 治傷寒六七日其人大下後脈沉遲手足厥逆下部脈不至咽喉不利唾膿血泄利不止為難治者方

麻黃

知母

萎蕤 亦作菖蒲

黃芩 各三兩

升麻

芍藥

當歸

乾薑

石膏

茯苓

白朮

桂心

甘艸

麥冬 各一兩傷寒論作天門冬

右十四味咬咀以水一斗先煮麻黃減二升去上沫次內諸藥煮取三升分服一升微取汗愈

衍義

傷寒六經例中惟厥陰見證最為龐雜以未離亢

逆之邪又挾風木之氣所以陰中常伏陽象如麻

黃升麻湯治傷寒六七日大下後脈沉遲手足厥

逆下部脈不至泄利不止一一盡顯陽邪陷陰之

兆其咽喉不利唾膿血明係陰火僭逆之徵故借

白虎湯中石膏知母甘艸以化陷溺陰中之邪麻

黃升麻黃芩以泄壯火鬱蒸之焰咽喉不利滋以



千金方行書卷十  
三  
萎蕤門冬唾膿血和以當歸芍藥以既經大下非  
乾薑白朮不能收攝虛陽非桂心茯苓不能通調  
營氣千金體此而立萎蕤湯以治風溫總皆少陰  
厥陰兩經緣合之邪也設非大下後脾不委頓則  
桂薑白朮可以不須升麻亦可裁酌要在臨證之  
權衡耳

治溫毒及傷寒內虛外熱攻胃下黃赤汁及爛肉  
汁赤滯下伏氣腹痛諸熱毒方

梔子

二七枚

豉

一升

薤白

一握

右三味以水四升先煮梔子薤白令熟次內豉煮  
取二升半分二服頓服取瘥

衍義

溫毒內攻而見下利煩擾故借太陽例中梔子豉  
湯加薤白一味上主胸中懊懺下除泄利下重也  
治病後虛腫方

豉

五升

醇酒

一斗

右二味煮三沸及熱頓服不耐酒者隨性覆取汗  
衍義脾虛不能統氣而浮散於外故用酒煮豉以滌除  
陳氣則氣隨汗泄而愈

治汗不止方

地黃三斤切以水一斗煮取三升分作三服



又方

白朮葉作飲飲之

又方

白朮方寸匕以飲服之

治卒得汗不止方

以溫酒服牛羊脂愈

一云服牛羊屎亦止

治盜汗及汗無時方

以韭根四十九枚水二升煮一升頓服之為度

又方

豉一升以酒二升漬三日服不瘥更合服不過

三劑即止

止汗方

牡蠣

牡蠣等分

右二味治下篩臨夜臥以水服五錢七

牡蠣散 治臥即出盜汗風虛頭痛方

牡蠣

白朮

防風各三兩

右三味治下篩酒服方寸七日二此方一切泄汗

服之三日皆愈

又方

牡蠣

雷丸

麻黃根各三兩



乾薑

甘艸各一兩

米粉二升

右六味治下篩隨汗處粉之

衍義

血熱蒸汗用生地黃 脾虛汗泄用白朮散 經

虛風熱自汗用酒服牛羊脂 瘀血自汗用韭根

虛陽上升用酒煮豉與前治病後虛腫無異但

有覆汗不覆汗之分 腎虛不能斂津而汗用杜

仲牡蠣 不應去杜仲加白朮防風祛風逐濕

溫粉用牡蠣麻黃根等味斂中寓散法也

勞復第十一論二首 方十八首 食忌九條

論曰凡熱病新瘥及大病之後食猪肉及羊血肥魚

油膩等必當大下利醫所不能治也必至於死若食

餅餌粢黍飴脯鱠炙棗栗諸果物脯修及堅實難消

之物胃氣尚虛弱不能消化必更結熱適以藥下之

則胃氣虛冷大利難禁不下之必死下之復危皆難

救也熱病及大病之後多坐此死不可不慎也

病新瘥後但得食糜粥寧少食令飢慎勿飽不得他

有所食雖思之勿與之也引日轉久可漸食羊肉白

糜若羹汁雉兔鹿肉不可食猪狗肉也新瘥後當靜

臥慎勿早起梳頭洗面非但體勞亦不可多言語用

心使意勞煩凡此皆令人勞復故督郵顧子獻得病



已瘥未健請華陀視脈曰雖瘥尚虛未得復陽氣不足慎勿勞事餘勞尚可女勞則死當吐舌數寸其婦聞其夫瘥從百餘里來省之經宿交接中間三日發熱口噤臨死舌出數寸病新瘥未滿百日氣力不平復而犯房室略無不死有士蓋正者疾愈後六十日已能行射獵犯房室卽吐涎而死及熱病房室名爲陰陽易之病皆難治多死近者有一士大夫小得傷寒瘥已十餘日能乘馬行來自謂平復以房室卽小腹急痛手足拘攣而死

時病瘥後未滿五日食一切肉麵者病更發大困

時病瘥後新起飲酒及韭菜病更發

時病新瘥食生魚鮮下痢必不止

時病新瘥食生菜令顏色終身不平復

時病新瘥汗解飲冷水者損心胞令人虛補不復

時病新瘥食生棗及羊肉者必膈上作熱蒸

時病新瘥食犬羊等肉者必作骨中蒸熱

時病新瘥食魚肉與瓜生菜令人身熱一本作腫

時病新瘥食蒜鱸者病發必致大困

黃龍湯 治傷寒瘥後更頭痛壯熱煩悶方 仲

景名小柴胡湯方



柴胡 半斤

半夏 半升

黃芩 三兩

人參 二兩

甘艸 二兩

生薑 四兩

大棗 十二枚

右七味咬咀以水一斗煮取五升去滓服五合日

三不嘔而渴者去半夏加栝蒌根四兩

衍義少陽為樞為表裏之分限小柴胡湯為少陽專方

柴胡引清氣左行於膽開發少陽之所必需膽受

風木之邪病則寒熱交爭故用黃芩以泄中外之

熱膽為清淨之府病則濁痰四逆故用半夏以辟

內沃之涎然非人參甘艸不能廓充大氣以禦外

入之邪非生薑大棗不能開通經脈以和傷殘之

氣千金借治瘥後勞復之證以其既經一翻發泄

則人參護持元氣尤為切務因易之以嘉名形容

神化不測之妙

補大病後不足虛勞方

萬病虛勞同用

取七歲已下五歲已上黃牛新生者乳一升以

水四升煎取一升如人體溫稍稍飲之不得過

多十日服不絕為佳

枳實梔子湯 治大病已後勞復者方

枳實 三枚

梔子 十四枚

豉 一升

綿裹

掃葉山房



右三味咬咀以酢漿七升先煎減三升次內枳實  
梔子煮取二升次內豉煮五六沸去滓分再服覆  
取汗如有宿食者內大黃如博棋子五六枚

治傷寒溫病後勞復或食或飲或動作方

梔子仁三七枚 石膏五兩 香豉一升

鼠屎尖頭大者二十枚

右四味咬咀以水七升煮取三升分三服

治食大飽不消勞復脈實者方

豉一升 鼠屎二十枚 梔子

大黃三兩

右四味咬咀以水六升煮取二升分二服微取汗

應小鴨溏者止不溏者復作

治新瘥早起及食多勞復方

豉五合 鼠屎尖頭者二十一枚

右二味以水二升煮取一升盡服之溫臥令小汗

愈崔氏加梔子七枚九良肘後有麻子仁內一升加水一升亦可內枳實三枚葱白一虎口

治重病新瘥早起勞及飲食多致發欲死方

燒鱉甲末飲服方寸七

治病新瘥遇美飲食食過多食復者方

取所食餘燒為末飲調服二錢七日三服



衍義

經云火淫所勝以苦發之此方加枳實於梔子豉湯中以發其微汗泄胸中虛煩正苦以發之也服後覆取微汗乃吐中寓汗之變法若有宿食加大黃下奪之設泥病後不敢用下則熱持而真陰益困矣傷寒論用清漿水空煎然後入藥同煎千金用酢漿和水煎服取酸以收火氣之散也中暑方中漿水散從此竊出 傷寒溫病後勞復或飲食動作致病用梔子豉湯不加枳實而加石膏以解飲酒復熱加鼠屎以斂肝腎虛陽然非溫病遺毒石膏不可輕用 食大飽不消勞復脈實梔子豉

湯不加枳實而加大黃卽有宿食加大黃之法更加鼠屎以淨少陰伏熱之源 新瘥早起及女勞復但用乾豉以辟不正餘邪鼠屎以化腎肝虛熱 大病新瘥早起復熱用鱉甲末專取滋陰而餘熱自化 病新瘥後飲食過多復熱用所食之餘燒末服之既不大傷元氣并無誤藥之失 麥門冬湯 治勞復氣欲絕起死人方

麥門冬 一兩 甘艸 二兩 京棗 二十枚

竹葉 升切一

右四味咬咀以水七升煮粳米一升令熟去米內



諸藥煎取三升分三服不能服者綿滴湯內口中用之有效

治食勞方

麵二升煮取汁服之

又方

杏仁五十枚以酢二升煎取一升服之取汗

欲令病人不復方

燒頭垢如梧桐子大吞服之

治傷寒瘥後一年心下停水不能食者方

生地黄 五斤 白朮 一斤 好麵 二斤

右三味合搗令相得曝乾下篩酒服方寸七日三

加至二七

衍義

勞復氣欲絕胃虛火乘於肺也方用麥冬滋肺竹

葉清心甘艸和中京棗以培脾氣之耗也 食勞

用麵煮取汁服以安少陽生發之氣然在西北風

土剛燥之地為當東南卑濕之所徒資濕熱良非

所宜 杏仁泄肺之滿苦酒收氣之散散中寓收

之法惟素稟可恃者為宜 傷寒向愈之時欲令

病氣不復乃取頭垢燒服反本還元以收上盛之

熱也 傷寒瘥後經年停水心下不食用生地黄



和木麪酒服欸除水氣蟲積必得涌吐方效昔人  
以鮮地黃搗汁搜麪作冷淘食之取吐不吐則利  
出長蟲如辟宮而安取義雖同而緩攻急追之法  
不侔也

論曰婦人溫病雖瘥若未平復血脈未和尙有熱毒  
而與之交接得病者名爲陰陽易病其人身體重熱

上衝胸頭重不能舉眼中生眵

一作膜

四肢

一云膝

拘

急小腹絞痛手足拳者卽死其亦有不卽死者病苦  
小腹裏急熱上衝胸頭重不欲舉百節解離經脈緩  
弱血氣虛骨髓竭便噓噓吸吸氣力轉少著牀不能  
動搖起止仰人或引歲月方死醫者張苗說有婢得  
病瘥後數日有六人姦之皆死

治婦人得病易丈夫丈夫得病易婦人方

取女人中裊近隱處燒服方寸七日三小便卽

利陰頭微腫此爲愈矣女人病可取男裊一如

此法

治交接勞復陰卵腫縮腹中絞痛便欲死方

取所交接婦人衣服以覆男子立愈

令人病不復方

取女人手足爪二十枚女人中衣帶一尺燒以



酒若米飲汁服之

治男子新病起近房內復者方

取女人月經赤帛燒服方寸匕亦治陰卵腫縮入腹絞痛欲死

治病後髮亂不可理通頭法

生麻油二斤將頭髮解開安銅沙羅中用油淹漬之細將釵子理髮斯須並自通矣

衍義陰陽易病雖言傷寒遺毒而實熱病居多以冬時伏氣藏於骨髓之中無由發泄得交接之淫火溢出乘虛襲入髓竅傳於不病之人蓋傷寒之邪傷

於血脈之中可從汗下而解卽解之未盡熱毒較輕非若伏藏之毒最盛而人感之則身重少氣少腹裏急陰中拘攣熱上衝胸頭重不舉眼中生花膝脛拘急乃陰中暴受熱毒又非蕩滌所宜故燒襠爲散以其人平昔所出敗濁同氣相求服之小便利陰頭微腫陰毒仍從陰竅而出也或以所交婦人衣服覆男子者亦取同氣之應也或以以女人爪甲衣帶燒服取筋之餘以療宗筋之病也或以女人月經赤帛燒服法與襠襠無異

百合第十二

論二首方七首



論曰百合病者謂無經絡百脈一宗悉致病也皆因傷寒虛勞大病已後不平復變成斯病其狀惡寒而嘔者病在上焦也二十三日當愈其狀腹滿微喘大便堅三四日一大便時復小溇者病在中焦也六十三日當愈其狀小便淋瀝難者病在下焦也三十三日當愈各隨其證以治之百合之為病令人意欲食復不能食或有美時或有不用聞飲食臭時如有寒其實無寒如有熱其實無熱常默默欲臥復不得眠至朝口苦小便赤澀欲行復不能行諸藥不能治治之即劇吐利如有神靈所為也百合病身形如和其脈微數其候每溺時即覺頭痛者六十日乃愈百合病候之溺時頭不覺痛浙浙然寒者四十日愈百合病候之溺時覺快然但覺頭眩者二十日愈百合病證其人或未病而預見其候者或已病四五日而出或一月二十日後見其候者治之善誤也依證治之論曰百合病見在於陰而攻其陽則陰不得解也復發其汗為逆也見在於陽而攻其陰則陽不能解也

復下之其病不愈要略云見於陰者以陽法救之見於陽者以陰法解之見陽攻陰復發其汗此為逆其病難治見陰攻陽乃復下之此亦為逆其病難治

百合知母湯 治百合病已經發汗後更發之方



百合七枚

知母三兩

右二味以泉水先洗漬百合一宿當沫出水中明旦去水取百合更以泉水二升煮取一升汁置之復取知母切以泉水二升煮取一升汁合和百合汁中復煮取一升半分再服不瘥更依法合服

百合滑石代赭湯 治百合病已經下後更發者

方

百合七枚

滑石三兩

代赭一兩

右三味先以泉水漬百合一宿明旦去水更以泉水二升煮百合取一升去滓又以水二升煮餘二

味取一升內百合汁如前法復煎取一升半分再服

百合雞子湯 治百合病已經吐後更發者方

以百合七枚擘漬一宿去汁以泉水二升煮取

一升取雞子黃一枚內汁中攪令調分再服

百合地黃湯 治百合病始不經發汗吐下其病

如初者方

以百合七枚擘漬一宿去汁以泉水二升煮取

一升半內生地黃汁一升復煎取一升半分再

服大便當去惡沫為驗也



治百合病經月不解變成渴者方

百合根一升以水一斗漬一宿以汁先洗病人  
身洗身後食白湯餅勿與鹽豉也渴不瘥可用  
栝蘘根并牡蠣等分為散飲服方寸七日三

治百合病變而發熱者方

百合根一兩 滑石三兩

右三味治下篩飲服方寸七日三當微利利止勿  
復服熱即除一本云治百合病小便赤澀臍下堅  
急

治百合病變腹中滿痛者方

但取百合根隨多少熬令黃色搗篩為散飲服  
方寸七日三滿消痛止

衍義

病無經絡可分百脈一宗致病故名百合其病雖  
有上中下三焦之別皆由傷寒虛勞大病後虛火  
擾其血脈所致是以飲食不食如寒無寒如熱無  
熱欲眠不眠欲行不行皆陽火爍陰無可奈何之  
狀藥雖治病然必藉胃氣以行之若毒血在脾胃  
經脈閉塞藥雖入而胃弱不能行故得藥轉劇而  
吐利也病不在皮肉筋骨則身形如和故脈微數  
脈數血熱則心火上炎不下交於腎而膀胱之經



亦不得引精於上上虛則溺時浙然頭眩甚則爲  
頭痛以此微甚可卜愈日之遠近也其治法咸用  
百合爲君以安心補神能去血中之熱利大小便  
導滌痰積然必鮮者方克有濟 若汗之而失者  
佐知母以調其上焦之津液 下之而失者佐滑  
石代赭以理其下焦之痺結 吐之而失者佐雞  
子黃以補其中焦之營血 若不經發汗吐下而  
血熱自汗但佐生地黃汁以涼血血涼則熱毒解  
而蘊結自行故大便當去惡沫也 其經月不解  
百脈內壅津液外泄而成渴者則用百合洗之一

身之脈皆得通暢而津液行渴自止勿食鹽豉者  
以味鹹能凝血也 若洗後渴不瘥是汗多津脫  
則以栝蔞牡蠣以斂固之 若變發熱乃血脈鬱  
而成熟佐滑石以通利之 百合病皆持兩端不  
表不裏爲其熱行血脈之中非如傷寒可行汗下  
法所以每多扼腕往往有綿延經歲不已者愈期  
不復可拘也但當隨所稟偏勝而調之慎勿誤認  
下元虛弱妄用溫補之法也

傷寒不發汗變成狐惑第十三

論一首  
方三首

論曰狐惑之病其氣如傷寒默默欲眠目不得閉起



臥不安其毒在喉咽為惑病在陰肛為狐病狐惑之病並惡飲食不欲食聞食臭其面目翕赤翕白翕黑毒食於上者則聲喝也喝一作嘔毒食下部者則乾咽也此由溫毒氣所為食於上者瀉心湯主之食於下者苦參湯淹洗之食於肛外者熏之并用雄黃三片稍置瓦瓶中炭火燒向肛熏之并服湯也

治狐惑湯方

黃連

四兩

薰艸

二兩

右二味咬咀白酢漿一斗漬一宿煮取三升分為三服

循義

狐惑總由濕熱生蟲以致默默欲眠寢食不安有似乎狐之性多惑多疑故以此類名病通用瀉心湯專攻濕熱固結之邪方中乾薑以行芩連之性人參以行芩連之力淹洗用苦參者取其苦燥專除濕化之蟲熏用雄黃取純陽之性以散濁惡之毒也服用黃連薰艸黃連即瀉心湯中專主佐以薰艸專辟惡氣即瀉心湯中乾薑之義煮用酢漿專收濕化之蟲味少力專其功不在瀉心之下耳赤小豆當歸散 其人脈數無熱微煩默默但欲臥汗出初得之三四日目赤如鳩眼得之七八



日其四皆黃黑能食者膿已成也治之之方  
以赤小豆三升漬之令生芽足乃復乾之加當  
歸三兩爲末漿水服方寸七日三卽愈

衍義此方專主熱毒鬱於血脈流入大腸而成狐惑之  
候其脈數無熱知熱不在表而在血也默默欲臥  
熱毒傷陰陰主靜也初得之二三日目赤如鳩眼  
七八日目四皆黃黑血溢於經不散凝積而爲癩  
也膿成則毒從外化無關於裏故能食也方以赤  
小豆清熱利水且浸令芽出以發越蘊積之毒佐  
當歸司統血之權使不致於散漫也至於先便後

血亦主此方以清小腸流入大便熱毒之源見證  
雖異而主治則同也

瀉心湯 其病形不可攻不可灸因火爲邪血散  
脈中傷脈尚可傷臟則劇并輸益腫黃汁出經  
合外爛肉腐爲癰膿此爲火疽醫所傷也夫脈  
數者不可灸因火爲邪卽爲煩因虛逐實血走  
脈中火氣雖微內攻有力焦骨傷筋血難復也  
應在瀉心瀉心湯兼治下痢不止腹中愒堅而  
嘔噦腸鳴者方

大黃 二兩

黃連

黃芩

各一兩

掃葉山房



右三味咬咀以水三升煮取一升頓服之

衍義

按傷寒論中瀉心湯五方方名各別惟金匱瀉心湯一方方合血中之火例治而集方者不察誤收半夏瀉心湯詳方中參半薑棗渾是溫氣之品殊非因火為邪焦骨傷筋所宜因力正之

傷寒發黃第十四

論三首 證五首 鍼灸圖方三十四首

論曰黃有五種有黃汗黃疸穀疸酒疸女勞疸黃汗者身體四肢微腫胸滿不渴汗出如黃蘗汁由大汗出卒入水中所致黃疸者一身面目悉黃如橘柚暴得熱以冷水洗之熱因留胃中食生冷瓜果所致若

成黑疸者多死穀疸者食畢頭眩心忪怫鬱不安面發黃由失飢大食胃氣衝熏所致酒疸者心中懊懣足脛滿小便黃面發赤斑黃黑由大醉當風所致女勞疸者身目皆黃發熱惡寒小腹滿急小便難由大勞大熱而交接竟入水所致但依後方治之

黃汗之為病身體腫發熱汗出而渴狀如風水汗沾衣色正黃如蘗汁其脈自沉從何得之此病以汗出入水中浴水從汗孔入得之

黃芪芍藥桂酒湯 治黃汗方

黃芪 五兩

芍藥 三兩

桂心 二兩



右三味咬咀以苦酒一升水七升合煎取三升飲一升當心煩也至六七日稍稍自除心煩者苦酒阻故也

衍義水濕從外漸漬於經非桂之辛溫無以驅之達表既用桂芍內和營血卽以黃芪外壯衛氣以杜濕邪之復入猶恐芪芍固護不逮更用苦酒收斂津液不使隨藥外泄然服藥後每致心煩乃苦酒阻絕陽氣不能通達之故須六七日稍和心下方得快然非若水煎湯液之性味易過也

黃疸之病疸而渴者其病難治疸而不渴其病可治

發於陰部其人必嘔發於陽部其人振寒而微熱

桂枝黃芪湯 治諸病黃疸宜利其小便假令脈

浮當以汗解方

桂枝

芍藥

生薑

各三兩

甘艸 二兩

黃芪 五兩

大棗

十二枚

右六味咬咀以水八升微火煎取三升去滓溫服一升覆取微汗須臾不汗者飲稀熱粥以助湯若不汗更服湯

衍義桂枝湯加膠飴名小建中取稼穡之甘入胃護營不獨爲風傷衛之本藥卽寒傷營之尺中微弱營



氣不足血少之證亦得用之於小建中內更加黃芪名黃芪建中以治諸虛羸瘦金匱為虛勞不足祛邪補正之首方千金又加當歸名當歸內補建中以治產後虛羸腹痛此但加黃芪助衛逐濕原無實衛之功亦無內補之用乃金匱之原方也

麻黃醇酒湯 治傷寒熱出表發黃疸方

麻黃三兩以醇酒五升煮取一升半盡服之溫覆汗出即愈冬月寒時用清酒春月宜用水

衍義

芪芍桂酒湯斂中寓散桂枝黃芪湯散中寓斂麻黃醇酒湯散中加散方中麻黃散表可謂專矣更

加酒煎協濟麻黃開發營中濕熱一舉而汗散無餘即此緩急之治可識受病之淺深矣

治黃疸方

瓜蒂

秫米

赤小豆

各二七枚

右三味治下篩病重者取如大豆二枚內著鼻孔中痛縮鼻須臾當出黃汁或從口中出汁升餘則愈病輕者如一豆不瘥間日復用又下里間以筒使人極吹鼻中無不死大慎之刪繁療天行毒熱通貫臟腑沉伏骨

衍義

見嬰兒傷寒發黃門中

髓之間或為黃疸黑疸赤疸白疸穀疸馬黃等病喘息須臾不絕



大黃丸 治同前

大黃

葶藶子

各二兩

右二味為末蜜和丸如梧子大每服十九日三病瘥止

又方

大黃

二兩

黃連

三兩

黃蘗

黃芩

各一兩

麩末

五合

右五味為末蜜和丸如梧子大先食服三丸日三不知加至五丸

衍義

大黃丸二方皆從金匱大黃硝石湯化出彼用硝

石之辛溫以行大黃梔蘖之苦寒此用葶藶佐大黃之開泄不必復用硝石散結也 次方取麩末以佐四黃之滌熱即是硝石佐大黃梔蘖之義識此變通諸法可推金匱妙用也

茵陳湯 治黃疸身體面目盡黃方

茵陳

黃連

各三兩

黃芩

二兩

大黃

甘艸

人參

各一兩

梔子

二十枚

右七味咬咀以水一斗煮取三升分三服日三亦

治酒疸酒癖



衍義茵陳蒿湯本治傷寒瘀熱在裏而發黃又合金匱

瀉心湯恐苦寒過甚有傷沖和之氣故加人參甘

艸扶助胃氣以行祛濕之力殊非虛而用補之意

三黃散 治同前

大黃

黃連

黃芩

各四兩

右三味治下篩先食服方寸七日三亦可為丸

衍義此即金匱瀉心湯三味但分兩稍異變湯為散專

取和滓以祛濕熱也

五苓散 治黃疸利小便方

豬苓

茯苓

澤瀉

白朮

桂心

各三兩

右五味搗篩為散渴時水服方寸七極飲水即利

小便及汗出愈

此與第九卷方相同以分兩不同故重出

衍義五苓散中全賴桂之辛散利水逐熱金匱加茵陳

治黃疸尤捷

秦椒散 治黃疸飲少溺多方

秦椒

六銖

瓜蒂

半兩

右二味治下篩水服方寸七日三

衍義黃疸飲少而溺反多雖有濕熱固結於中因胸中

之陽本虛所以不能消水故用秦椒之辛烈温中



破結瓜蒂之苦寒逐濕除寒不得泛用利水藥傷  
伐下焦陽氣也

小半夏湯 治黃疸小便色不異欲自利腹滿而  
喘者不可除熱熱除必噦方

半夏

生薑各半斤

右二味㕮咀以水七升煮取一升五合分再服有  
人常積氣結而死其心上暖以此湯少許汁入口  
遂活

我術

黃疸雖小便之色不異然必不能清利如常以濁  
濕之氣上逆而致喘滿設不審中氣之本虛誤與

若寒必致嘔噦自利故借金匱生薑半夏湯以治  
胸中似喘不喘似嘔不嘔似噦不噦徹心中憤憤  
然無可柰何之狀與此恰合使胸中氣化通痰逆  
降則黃疸不治而治矣

治黃疸方

取生小麥苗搗絞取汁飲六七合晝夜三四飲  
三四日便愈無小麥穢麥亦得用之

衍義

小麥苗搗絞取汁以其得春升之氣最早故取以  
通達肝氣之滯無苗穢亦可性與青苗不異  
治黃疸變成黑疸醫所不能治者方



千金方衍義卷一  
土瓜根搗汁一小升頓服日一平旦服至食時  
病從小便出先須量病人氣力不得多服力衰  
則起不得

符義土瓜根卽王瓜之根性味寒滑通津化熱本經主  
治與栝蘘根相類其治黃疸變黑惟濕熱久漬不  
得下泄通身浮腫黯黑者爲宜若用以治女勞疸  
及飲酒使內額上黑之陰疸虛實寒熱迥異豈但  
力衰不得起而已哉

治發黃身面目悉黃如金色小便如濃煮蘗汁衆  
醫不能療者方

茵陳

梔子

各四兩

黃芩

大黃

柴胡

升麻

各三兩

龍膽

二兩

右七味咬咀以水八升煮取二升七合分三服若  
身體羸去大黃加梔子五六兩生地黃一升

延年錄無

茵陳有梔子四兩栝蘘三兩苾  
硝二兩近效方加枳實二兩

夫黃發已久變作

桃皮色心下有堅嘔逆不下飲食小便極赤而少  
四肢厥冷脈深沉極微細遲者不宜服此方得下  
必變碗也宜與大茵陳湯除大黃加生地黃五兩  
服盡湯消息看脈小浮出形小見不甚沉微便可



治也脈浮見者黃當明不復作桃皮色心下自寬也

衍義疸病而致通身面目悉黃溺如濃煎蘗汁濕熱漸漬已劇雖日用茵陳大黃不得升麻柴胡開提於上龍膽芩梔降泄於下何能分解其勢而使之克應哉其方後有云若身體羸去大黃加梔子生地黃以清血中之熱曷不去龍膽而去大黃以目黃證在肝經是以不得不用耳若黃久不除變作桃皮色者是中氣為水濕所遏不得運行中外所以心下有堅嘔逆不食雖四肢逆冷六脈深沉但審

其小便赤少知為熱鬱在裏而傷耗津液又當推

大茵陳湯亦須去大黃易生地黃方為合法

大茵陳湯 治內實熱盛發黃黃如金色脈浮大

滑實緊數者大發黃多是酒客勞熱食少胃中熱或溫毒內熱者故黃如金色方

茵陳

黃蘗 各一兩半

大黃

白朮

各三兩

黃芩

甘艸

茯苓

栝蘗根

前胡

枳實

各二兩

梔子

二十枚

右十一味咬咀以水九升煮取三升分三服得快



下消息三四日更治之

衍義

發黃本乎濕熱濕熱本乎脾虛此以枳朮苓甘加入茵陳蒿湯中助脾逐濕佐以前胡栝蒌下氣通津黃蘗黃芩燥濕清火皆本經治諸熱黃疸之專藥較茵陳蒿湯功力倍常因以大字銜之

苦參散 治人無漸忽然振寒發黃皮膚黃麴塵

出小便赤少大便時閉氣力無異食飲不妨已服諸湯散餘熱不除久黃者宜吐下方

苦參

黃連

瓜蒂

黃蘗

大黃 各一兩

葶藶 一兩

右六味治下篩飲服方寸匕當大吐吐者日一服不吐日再亦得下服五日知可消息不覺退更服之小折便消息之

衍義

病起於忽然振寒知為少陽火氣鬱發奪其春升之令津液不能灌充所以色黃枯悴有如麴塵出現於皮膚洵為膽熱無疑更審二便閉滯飲食如故胃氣尙堪克任苦寒故用苦參三黃峻攻濕熱兼瓜蒂佐苦參取吐於上葶藶佐大黃降泄於下上下開泄急通少陽之樞則津液方得灌充是皆病起於暴之至治也若因病而漸次成疸正氣本



虛之證又非此方可擬也

治發黃方

茵陳

黃蘗

梔子

大黃各三兩

黃連二兩

右五味咬咀以水九升煮取三升分三服先服湯

後服丸方

大黃五兩

茵陳

梔子各三兩

黃芩

黃蘗

黃連各二兩

右六味為末蜜丸如梧子大白飲服二十九令微

利

義衍梔子蘗皮湯本治熱蘊於經身黃發熱茵陳蒿湯

本治瘧熱在裏不能發越頭汗身黃此兼二方之

制以治表裏俱熱乃於梔子蘗皮湯中除去甘艸

之甘緩而加黃連之苦燥以緩攻其餘此先後緩

急之治也

麻黃連翹赤小豆湯 治傷寒瘧熱在裏身體必

發黃方

麻黃

連翹

甘艸各二兩

生薑三兩

大棗十二枚

杏仁三十枚

赤小豆一升

生梓白皮二升切



右八味咬咀以勞水一斗先煮麻黃去沫次內諸藥煎取三升分三服

衍義傷寒論瘀熱在裏而發黃有二方茵陳蒿湯治瘀熱在裏不得發越而頭汗身黃故用茵陳梔子大黃引之下泄此治傷寒之邪失於表散或汗之不徹瘀熱在裏而身發黃故借用麻黃湯法於中減却桂枝增入連翹梓皮赤小豆清熱利水生薑大棗開發肌腠使濕熱之氣半從元府而解半從滲道而解不可泥詞害義以為瘀熱在裏反用表藥致惑也

茵陳蒿湯 治傷寒七八日內實瘀熱結身黃如

橘小便不利腹微脹滿宜下之方

茵陳 六兩

大黃 三兩

梔子 四枚

右三味咬咀以水一斗二升先煮茵陳取五升去

滓次內梔子大黃煎取三升分服一升日三小便

當利如皂莢沫狀色正赤當腹減黃悉隨小便去

也 范注用療穀疸水品方有石膏一斤

衍義見前麻黃連翹赤小豆湯下

大黃黃蘗湯 治發黃腹滿小便不利而赤自汗

出此為表和裏當下之方



大黃 三兩

黃蘗

芒硝 各四兩

梔子 十五枚

右四味咬咀以水六升煮取二升去滓內芒硝緩煎取一升先食頓服之

衍義發黃而見腹滿溺赤全是裏實之驗故宜急追無

容憚緩硝黃梔蘗雖云峻攻之味而實保全真陰之上藥也

茵陳丸 治時行病急黃并瘴癘疫氣及瘡瘡方

茵陳

梔子

芒硝

杏仁 各三兩

巴豆 半兩

恆山

鯨甲 各二兩

豉 五合

大黃 五兩

右九味為末以飴和丸如梧子大飲服三九以吐利為佳不知加一丸初覺體氣有異急服之即瘥

神效

衍義瘴癘疫瘧忽然發黃難與尋常疸證並論方中硝

黃茵陳梔子不得巴豆蕩練之力則毒熱不能從之下奪乾豉杏仁專解時行之邪恆山鯨甲專祛疫瘧之毒也

治急黃熱氣骨蒸兩目赤脈方

芒硝 一兩

大黃 一兩半末

生地黄汁 八合

掃葉山房



右三味合和一服五合日二以利為度不須二服  
衍義疽發而見骨蒸似乎虛象以病起於急屬實何疑  
其兩目脈赤又為血熱之驗故於金匱大黃硝石  
湯中裁去黃蘗梔子之苦寒加入生地黃汁專化  
血脈之滯也

治風疽小便或黃或白灑灑寒熱好臥不欲動方

三月生艾

一束搗取銅器中煎如漆密封之

苦參

大黃

黃連

凝水石

栝蘘根

葶藶各六兩

右七味以六味為末艾煎和丸如梧子大先食服

五九日二可至二十九有熱加苦參渴加栝蘘小  
便澀加葶藶小便多加凝水石小便白加黃連大  
便難加大黃

衍義

病人濕熱內盛加以風邪外襲所以灑灑寒熱其  
證懶於動作嗜臥小便或白或黃皆濕熱時降時  
升之驗故於苦參散中裁汰瓜蒂黃蘗進用艾汁  
溫散風熱兼凝水石栝蘗佐諸苦寒以行津化熱  
為務也

寸口脈浮而緩浮則為風緩則為痺痺非中風四肢  
苦煩脾色必黃痲熱以行跗陽脈緊而數數則為熱



熱則消穀緊則為寒食則滿也尺脈浮為傷腎跗陽脈緊為傷脾風寒相薄食穀即眩穀氣不消胃中苦濁濁氣下流小便不通陰被其塞熱流膀胱身故盡黃名曰穀疸。

治勞疸穀疸丸

苦參 三兩

龍膽 一兩

右二味為末牛膽和為丸如梧子大先食以麥粥飲服五九日三不知稍加之。刪繁方加梔子仁三七枚以猪膽和為丸  
衍稼穡作甘而蘊熱發黃故用苦參之苦燥以攻穀疸之蘊熱龍膽之苦寒以瀉勞疸之積火丸用牛

膽汁取以為膽熱之嚮導先食麥粥飲服乃金匱硝石礬石散之成法取助胃氣以行藥力也

夫酒疸其脈浮者先吐之沉弦者先下之夫人病酒疸者或無熱靖言了了腹滿欲吐嘔者宜吐之方前苦參散七味者是酒疸必小便不利其候當心中熱足下熱是其證也夫酒疸下之久久為黑疸目青面黑心中如啖蒜齏狀大便正黑皮膚爪之不仁其脈浮弱雖黑微黃故知之

枳實大黃湯 治傷寒飲酒食少飲多痰結發黃

酒疸心中懊懣而不甚熱或乾嘔方



枳實 五枚

大黃 三兩

豆豉 半升

梔子 七枚

右四味咬咀以水六升煮取二升分三服心中熱  
疼懊懣皆主之

衍義

此即傷寒勞復枳實梔子豉湯若有宿食加大黃  
之法使宿食可化濕熱可祛黃疸自除即胸中懊  
懣舍梔子豉湯別無良法

凝水石散 治內疸飲少小便多如白泔色此病  
得之從酒方

凝水石

白石脂

栝萇根

桂心 各三  
十銖

兔絲子

知母 各十  
八銖

右六味治下篩麥粥飲服五分七日三服五日知  
十日瘥

衍義

治疸通用逐濕利水而此獨用寒水石治身熱腹  
中積聚邪氣皮中如火燒煩滿專治腎臟虛火深  
得本經之奧至於白石脂性專固脫殊非疸病所  
宜以其飲少溺多色白如泔知為腎虛標熱故以  
桂心兔絲佐白石英溫補下元知母栝萇佐寒水  
石兼化標熱病因飲酒使內故名之曰內疸

茯苓丸 治心下縱橫堅而小便赤是酒疸者方



茯苓

茵陳

乾薑各一兩

白朮熬

枳實各三兩

半夏

杏仁各十枚

甘遂六銖

蜀椒

當歸各十銖

右十味為末蜜和丸如梧子大空腹服三九日三

稍稍加以小便利為度

翼方加黃連一兩大黃十銖名茵陳丸治黑疸身

體闊黑小便澀

衍義

前凝水石散治內疸此茯苓丸治酒疸乃酒積漬於心下按之縱橫格指故用蜀椒乾薑溫散堅痞枳朮苓半健運痰濕杏仁當歸下氣和血甘遂茵

陳破結利水為酒疸開辟去路也

半夏湯

治酒癖陰胸心脹滿骨肉沉重逆害飲

食乃至小便赤黃此根本虛勞風冷飲食衝心

由脾胃內痰所致方

半夏一升

生薑

黃芩

茵陳

當歸各二兩

前胡

枳實

甘艸

大戟各一兩

茯苓

白朮各三兩

右十一味咬咀以水一斗煮取三升分作三服

衍義

茯苓丸治胸中寒飲故用蜀椒乾薑半夏湯治胃



中熱痰故用黃芩生薑此方中前胡甘艸則前方杏仁之意此方中大戟即前方甘遂之意其餘則兩方並用總皆健運中氣之品中氣健運雖根本虛勞藥無不應酒疸無容留之患矣

牛膽丸 治酒疸身黃麴塵出方

牛膽 一枚

芫花 一升

蕘花 半升

瓜蒂 三兩

大黃 八兩

右五味四味咬咀以清酒一斗漬一宿煮減半去滓內牛膽微火煎令可丸如大豆服一丸日移六七尺不知復服一丸至八九膈上吐膈下利或不

吐而自愈

衍義

靈樞有云酒氣慄悍入於胃中則胃脹氣上逆滿於胸中肝浮膽橫膽之熱滿而汁溢於外以漸滲於經絡則身目皆黃芫花蕘花瓜蒂大黃一派苦寒藉牛膽汁為丸引入膽家隨其攸利以取吐下則津液流通麴塵之色自化前治勞疸穀疸方中用牛膽汁是瀉積勞之火此用牛膽汁以瀉酒濕之熱也

茵陳丸 治氣淋臏脹腹大身體面日悉黃及酒

疸短氣不得息方



茵陳

天門冬

梔子

各四兩

大黃

桂心

各三兩

通艸

石膏

各二兩

半夏

半升

右八味蒸大黃通艸天冬梔子半夏曝令乾合搗  
篩蜜丸如大豆服三丸日三忌生魚以豆羹服不  
得用酒 一方去石膏內滑石二兩不知加至十  
丸

衍義詳方下臚脹腹大皆由濕熱氣蒸而致面目悉黃  
短氣不得息故以導氣化熱為主惟桂心熱因熱  
用之內應即酒疸亦不出此

黃家至日晡所發熱而反惡寒此為女勞得之當臚  
臚急小腹滿體盡黃額上黑足下熱因作黑疸其臚  
腹脹而滿如欲作水狀大便必黑時澹泄此女勞疸  
非水也腹滿者難治

消石礬石散 治女勞疸方

消石

礬石

各半兩

右二味治下篩大麥粥汁服方寸七日三重衣覆  
取汗病隨大小便出小便正黃大便正黑

衍義五疸之中以黑疸為最劇而黑疸之因有二一從  
女勞得之一從酒疸不慎而變黑色總皆腎憊之



候病則日晡發熱而反惡寒陰邪鬱抑陽氣也膀胱急小腹滿陰邪結於陰分也身黃額上黑陰邪上侮陽位也足下熱陰虛陽必湊之也腹滿臏脹濁陰之氣上逆也如欲作水狀大便黑時溏本非水病而化血爲水也腹滿者難治瘀血固結陰虛難於峻攻也然病雖危迫又不忍納手坐視金匱乃竭厥心力急需硝石以攻固結之陰邪皂礬以破委積之瘀垢爲女勞疸開一死中求治法門圖僥倖於萬一在虛不勝攻勢不獲已者則以硝石和礬硃神麩和丸大麥粥汁服十九丸至二十九丸且

有瘀血發黃正氣衰敗而變黑疸濱危尤甚虛扁不能爲力也

濕疸之爲病始得之一身盡疼發熱面色黑黃七八日後壯熱熱在裏有血當下去之如狎肝狀其小腹滿者礬石滑石散急下之亦治一身盡黃目黃腹滿小便不利方

礬石 滑石 各五兩

右二味治下篩以大麥粥汁服方寸七日三先食服之便利如血者已當汗出瘥

衍義此祖金匱女勞疸法復立礬石滑石散因血既下



如狫肝狀雖小腹當滿量結必不甚堅故但取皂  
礬之滌垢佐滑石以利竅不須硝石峻攻也

黃疸之為病日晡所發熱惡寒小腹急身體黃額黑  
大便溏黑足下熱此為女勞腹滿者難治治之方

滑石石膏散

滑石

石膏 等分

右二味治下篩大麥粥汁服方寸七日三小便極  
利則瘥

衍義證雖日晡發熱惡寒身黃額上微黑而無血下如  
狫肝狀總大便溏黑諒無實結可攻故重立滑石

石膏散但用石膏佐滑石利竅化熱并去皂礬之  
堅攻此隨證以定法外之法仍不出法中之法也  
詳前後諸方獨不及陰黃之治者以秦中稟賦  
剛強絕無虛寒之患故無藉於辛溫之藥也

鍼灸黃疸法

正面圖第一

寅門  
俠承漿

上斷  
舌下

上勝  
肩裏

俠人中  
顛顛

巨關  
上腕  
陰縫

寅門穴 從鼻頭直入髮際度取通繩分為三斷  
繩取一分入髮際當繩頭鍼是穴治馬黃黃疸  
等病



上斷裏穴 正當人中及脣鍼三銓治馬黃黃疸  
等病

上腭穴 入口裏邊在上縫赤白脈是鍼三銓治  
馬黃黃疸四時等病

舌下穴 俠舌兩邊鍼治黃疸等病

脣裏穴 正當承漿裏邊通齒斷鍼三銓治馬黃  
黃疸寒暑溫疫等病

顛顛穴 在眉眼尾中間上下有來去絡脈是鍼  
灸之治四時寒暑所苦疸氣溫病等

俠人中穴 火鍼治馬黃黃疸疫通身並黃語音

已不轉者

俠承漿穴 去承漿兩邊各一寸治馬黃急疫等  
病

巨闕穴 在心下一寸灸七壯治馬黃黃疸急疫  
等病

上腕穴 在心下二寸灸七壯治馬黃黃疸等病  
男陰縫穴 按陰反向上灸治馬黃黃疸等病

若女人玉門是穴男女鍼灸無在

覆面圖第二 風府 熱府 肺膈 心膈  
肝膈 脾膈 腎膈 脚後跟

風府穴 在項後入髮際一寸去上骨一寸鍼之



頭中百病馬黃黃疸等病

在第二節下兩傍相去各一寸五分鍼

治馬黃黃疸等病

肺腧

從肺腧數第三椎兩傍相去各一寸五

分灸主黃疸通治百毒病

心腧

從心腧數第二椎兩傍相去各一寸五

分

肝腧

從肝腧數第四椎兩傍相去各一寸五

分

脾腧

從脾腧數第二椎兩傍相去各一寸五

分

腎腧

從腎腧數第三椎兩傍相去各一寸五

分

脚後跟穴

從白肉後際鍼灸隨便治馬黃黃疸

寒暑諸毒等病

側面圖第三

耳中錢孔

頰裏太衝

手太陽

臍石子頭

耳中穴

在耳中孔上橫梁是鍼灸之治馬黃黃

疸寒暑疫毒等病

頰裏穴

從口吻邊入往對頰裏去口一寸鍼主

治馬黃黃疸寒暑溫疫等病頰兩邊同法



手太陽穴 手小指端灸隨年壯治黃疸

臍石子頭穴 還取病人手自捉臂從腕中太澤

澤當文向上一尺接白肉際灸七壯治馬黃黃

作淵疸等病

錢孔穴 度乳至臍中屈肋頭骨是灸百壯治黃

疸

太衝穴 鍼灸隨便治馬黃黃疸温疫毒等病

温瘧第十五 論一首 方三十一首 灸刺法 十九首 禳瘧法一首 符二首

論曰夫瘧者皆生於風夏傷於暑秋為瘧瘧也問曰瘧先寒而後熱者何也對曰失寒者陰氣也風者陽

氣也先傷於寒而後傷於風故先寒而後熱也病以時作名曰寒瘧問曰先熱而後寒者何也對曰先傷於風而後傷於寒故先熱而後寒也亦以時作名曰温瘧其但熱而不寒者陰氣先絕陽氣獨發則少氣煩悶手足熱而欲嘔名曰瘧瘧問曰夫病温瘧與寒瘧而皆安舍舍於何藏對曰温瘧者得之冬中於風寒氣藏於骨髓之中至春則陽氣大發邪氣不能自出因遇大暑腦髓鑠肌肉消腠理發泄因有所用力邪氣與汗皆出此病邪氣先藏於腎其氣先從內出之於外也如是則陰虛而陽盛盛則病矣衰則氣復



反入入則陽虛虛則寒矣故先熱而後寒名曰溫瘧  
問曰瘧瘧何如對曰瘧瘧者肺素有熱氣盛於身厥  
逆上衝中氣實而不外泄因有所用力腠理開風寒  
舍於皮膚之內分肉之間發則陽氣盛陽氣盛而不  
衰則病矣其氣不及於陰故但熱而不寒氣內藏於  
心而外舍於分肉之間令人消鑠脫肉故名曰瘧瘧  
夫瘧之旦發也陰陽之旦移也必從四肢始也陽已  
傷陰從之故氣未并先其時一食頃用細左索繫束  
其手足十指令邪氣不得入陰氣不得出過時乃解  
夫瘧脈自弦也弦數者多熱弦遲者多寒弦小緊者  
可下之弦遲者可溫之若脈緊數者可發汗鍼灸之  
脈浮大者吐之瘧脈弦數者風發也以飲食消息止  
之  
瘧歲歲發至三歲或連月發不解者以脇下有痞也  
治之不得攻其痞但得虛其津液先其時發其汗服  
湯已先小寒者引衣自覆汗出小便利即愈瘧者病  
人形瘦皮上必粟起也病瘧一日發當以十五日愈  
設不瘥當月盡解也不愈當云何師曰此病結爲癥  
瘕名曰瘧母急當治之

驚甲煎丸 主之方

千金方行義卷一

五

掃葉山房



鱉甲十二分

半夏

人參各一分

大戟

瞿麥

桃仁

海藻

葶藶各二分

阿膠

紫葳

石韋

乾薑十五分

大黃

厚朴

桂心

蝨蟲各三分要略作鼠婦

麝蟲

丹皮

芍藥各五分

蜂窠四分

蛻螂

柴胡各六兩

烏扇

黃芩各十八銖

右二十四味為末取鍛竈下灰一斗清酒一斛五斗以酒漬灰取酒煮鱉甲盡爛泯泯如漆絞去滓

下諸藥煎為丸如梧子大未食服七丸日三仲景方無

大戟多赤芍

行義

北方水土剛勁瘧邪發越良難為害最重南方風氣柔弱發散皆易為患猶輕原其受病之因多由痰食內滯風邪外閉內外兼併所以寒熱交爭至於病久不除或治之不當結成瘧母必著於左脇者肝邪必結肝部也積既留著客邪內從火化當無外散之理故專取鱉甲伐肝消積尤妙在灰煮去滓後下諸藥則諸藥咸得鱉甲引入肝膽部分佐以柴胡黃芩同躋少陽區域參薑朴半助胃祛



痰桂芍牡丹桃葳阿膠和營散血蛻螂蜂窠蠱廬  
烏扇聚毒勢攻瞿葦藻戟葶藶大黃利水破結未  
食前服七九日服不過二十餘粒藥雖峻而不驟  
傷元氣深得峻藥緩攻之法又易金匱方中赤硝  
毒劣則易之以藻戟鼠婦難捕乃易之以蠱廬略  
為小變不失大端

柴胡栝蘘根湯

治瘧而發渴者方

柴胡

八兩

黃芩

人參

甘艸

生薑

各三兩

大棗

二十枚

栝蘘根

四兩

右七味咬咀以水一斗二升煮取六升去滓煎取  
三升溫服一升日三

衍義

少陽木火氣盛消礫陽明之津液是以煩渴瘧邪  
隨火進退總不離少陽之經合用小柴胡進退施  
治進用栝蘘退去半夏方合病機金匱方下并治  
火盛津傷之勞瘧專取栝蘘根之滋津化熱也小  
柴胡湯在傷寒瘧後頭痛壯熱煩悶方中易其名  
曰黃龍湯方後有云渴去半夏加栝蘘根可見用  
方在合病情不在主治何病也  
蜀漆散 多寒者牝瘧也治之方



蜀漆

雲母

龍骨 等分

右三味治下篩先未發一炊頃以酢漿服半錢臨發服一錢温瘧加蜀漆半分雲母燒三晝夜

衍義

此以邪伏陰經故謂牝瘧金匱方從古誤刊牝瘧即千金之智略不加察亦仍其誤而為牝瘧趙以德金匱衍義註作心為牝藏不特穿鑿且復支離曷知邪氣內藏於心則獨熱無寒謂之瘧瘧伏藏於腎則多寒少熱謂之牝瘧濁陰痰涎深伏幽隱非用蜀漆和漿水涌吐之法無以發越陽氣更須龍骨固斂陰津於下雲母升舉陽氣於上斯陽從

龍起陰隨涌泄庶胸次得以廓然蜀漆性專逐濕追痰稍增半分於本方之中則可以治太陰濕瘧濕為陰邪糾紐其陽亦必多寒少熱故此方尤為符合舊本金匱方後誤作温瘧大謬詳雲母龍骨純陽之性決非温瘧所宜以牝為牝將濕作温干古未剖之疑團一旦豁然貫通矣

牝瘧湯

牝瘧者多寒治之方

牡蠣

麻黃 各四兩

甘艸 二兩

蜀漆

三兩無以恒山代之

右四味先洗蜀漆三過去腥咬咀以水八升煮蜀



漆麻黃得六升去沫乃內餘藥煮取二升飲一升  
卽吐出復飲之

衍義

外臺牡蠣湯方下主治牡瘧多寒則牝牡不辨已  
不在千金方後也此方中牡蠣卽蜀漆散中龍骨  
之意蜀漆得雲母專升陽邪陷陰故以純陽之龍  
骨爲佐此方中麻黃卽蜀漆散中雲母之意蜀漆  
得麻黃專開陰邪之固閉故以純陰之牡蠣爲輔  
甘艸調和藥性之陰陽也

有瘧瘧者陰氣孤絕陽氣獨發而脈微其候必少氣  
煩冤手足熱欲嘔但熱而不寒邪氣內藏於心外舍  
於分肉之間令人消爍脫肉也

有溫瘧者其脈平無寒時病六七日但見熱也其候  
骨節疼煩時嘔朝發暮解暮發朝解名溫瘧

衍義

瘧之陰衰離於陽陽亦不并於陰故陽獨發而但  
熱肺受火抑故脈微少氣脾爲熱乘故手足熱胃  
因邪逆故欲嘔邪氣內藏於心故煩冤外舍分肉  
故肉爍條下雖未出方合用白虎無疑白虎專於  
退熱其分肉四肢內屬脾胃非切於所舍者乎又  
瀉心肺之火非救其少氣煩冤者乎

白虎加桂湯 治之方



石膏 一斤

知母 三兩

甘艸 二兩

粳米 六合

右四味咬咀以水一斗二升煮米爛去滓加桂心三兩煎取三升分三服覆令汗先寒發熱汗出者愈

衍義

內經言溫瘧先熱後寒金匱言溫瘧但熱不寒雖有似乎癰瘧而實不同也癰瘧兩陽合邪上薰心肺所以少氣煩冤消爍肌肉溫瘧脈如平人邪未合而津未傷陽受病而陰不病所以骨節煩疼時嘔惟白虎以治陽邪加桂以通營衛則陰陽和血

脈通得汗而愈矣

麻黃湯 治瘧須發汗方

麻黃

桂萸根

大黃

各四兩

甘艸 一兩

右四味咬咀以水七升煮取二升半分三服未發前食頃一服臨發一服服後皆厚覆取汗

衍義

瘧宜發汗必壯熱脈實勢不得不用麻黃急開肌表以泄外淫之邪更審便溺燥結又不得不用大黃并疎裏氣以通內蘊之滯麻黃力猛甘艸和之大黃性暴枯萸根濡之方得兼濟之妙服後厚覆取



汗必非夏秋時瘧治例卽當寒月苟非北方稟賦之強亦難效用用方者不可不審反歸咎於立方之過也

治瘧或間日發者或夜發者方

恒山

竹葉

各三兩

秣米

一百粒

石膏

二兩

右四味咬咀以水八升銅器中漬藥露置星月下高淨處橫刀其上明日取藥於病人房中以銅器緩火煎取三升分三服清旦一服未發前一食頃一服臨發一服三服訖靜室中臥莫共人語當一

日勿洗手面及漱口勿進食取過時不發乃澡洗

進食并用藥汁塗五心胸前頭面藥滓置頭邊曾

用神效

救急方用烏梅二十七枚

衍義

瘧之日發夜發或間日發由邪伏之淺深不同氣血所受非一此槩用恒山峻攻痰水或吐或下隨

其攸利然在發散表邪後熱邪內盛而煩渴不止故借白虎竹葉石膏之法兼清肺胃之熱若中氣虛寒難於勝任者又未可以漫試也

又方

先作羊肉臠麩餅飽食之并進少酒隨所能令



欣欣有酒氣入密室中燃炭火厚覆取大汗卽瘥

又方

燒黑牛尾頭毛作灰酒服方寸七日三

衍義羊肉補形羸不勝藥攻故需酒肉醉飽密室火

烘覆汗營衛得和卽瘥 諸毛之灰皆能收濕牛

屬坤土取尾毛燒灰專除濕熱陳氣也

恒山丸 治瘡瘻說不可具方

恒山

知母

甘艸

大黃 各十  
八銖

麻黃 一兩

右五味爲末蜜和丸如梧子大未食服五丸日二

不知漸增以瘥爲度 肘後無  
大黃

衍義恒山截瘡首推善破胸中痰結得甘艸則吐得大

黃則利至於麻黃乃攻表之峻藥瘡久成瘵有何

客邪而復用之不知麻黃在丸劑中但爲隨班效

力不能專逞其功況有知母斂其走表之性亦必

從之而內奪矣前麻黃湯中大黃則隨麻黃走表

此恒山丸中麻黃則隨大黃走裏湯以急蕩丸以

緩攻乃必然之理故瘡瘻得以用之苟不能透此

一關未可與言千金之法



又方 治癰經數年不瘥者兩劑瘥一月已來一劑瘥方

恒山三兩為末以雞子白和并手丸如梧子大置銅器中於湯中煮令熟殺腥氣則止以竹葉飲服二十九欲吐但吐至發令得三服時早可斷食而晚不可斷食可竹葉汁煮糜少食之

衍義 恒山治瘰有劫痰截病之功在胃氣虛人入口吐逆昏眩以故畏如戈戟即強實人亦須雞子白和丸煮令去腥庶不大傷中氣服用竹葉飲專清胃中煩熱服時早可斷食隔晚不可斷食恐胃太空

虛無力以行藥性也

梔子湯 治同前

梔子 十四枚

秫米 四十粒

恒山 三兩

車前葉 二十七枚 炙乾

右四味咬咀以水九升煮取三升分三服未發一服發時一服發後一服以吐利四五行為度不止冷飲止之

衍義

梔子湯中用秫米即前方用雞子白之意用梔子車前即前方用竹葉之意

又方



恒山 三兩

烏賊骨

升麻

鱉甲

附子 各一兩

右五味咬咀絹袋盛以酒六升漬之小合近火轉之一宿成一服一合比發可數服或吐下

衍義

方中升麻鼓恒山以上涌烏鰂佐鱉甲以下泄附子和酒徹底以破濁陰涎垢也

治瘧方

鱉甲 方寸炙

烏賊骨 方二寸

附子 炮

甘艸 各一兩

恒山 二兩

右五味咬咀以酒二升半漬之露一宿明日塗五

心手足過發時瘧斷若不斷可飲一合許瘧

衍義

此方不用升麻而用甘艸恒山得甘艸則吐較升麻上升尤捷用塗五心前方亦無不可

治瘧無問新久者方

小便 一升半

蜜 三七

右二味煮三沸頓服每發日平旦時服自至發勿食重者漸退不過三服瘧

又方

車前子

鼠尾子 各一虎口

右二味以水五升煮取二升未發前服盡



又方

馬鞭艸汁五合酒三合分三服

又方

搗葇荑根燒為灰和水服一合量人大小強弱用之

又方

瓜蒂二七枚搗水漬一宿服之

又方

衍義常以七月上寅日採麻花為末酒服方寸匕小便寒降恐其滯邪者煮沸則不速下和蜜湯以留

中故瘧無新久咸可用之然必陰虛火旺者為宜

車前取其利水鼠尾取其散熱若表邪方盛未

可槩施 馬鞭艸功專入肝散血婦人經行前後

尤為合轍 葇荑子性稟陰毒燒灰猶能逐濕陰

邪弱人不宜常試 瓜蒂吐胸中痰濕較之恒山

力雖稍遜亦是傷胃之品 麻花之性走而不守

追逐遍體諸風惡血得酒以行其力而惡疾自除

蜀漆九 治勞瘧并積勞寒熱發有時似瘧方

蜀漆 麥冬 知母

白薇 地骨皮 升麻 各三

十銖 掃葉山房



甘艸

鱉甲

烏梅肉

萎蕤

各一兩

恒山

一兩半

石膏

二兩

鼓

一合

右十三味為末蜜和丸如梧子大飲服十九日再服之稍稍加至二三十丸此神驗無不瘥也  
方加光明砂一兩

衍義

此治積勞成瘧非虛勞之謂勞則火起於腎而積勞致困肝脾不能無預然火性上炎肺胃亦不能無傷所以備用各經清潤之品惟升麻一味升散寒熱猶恐鼓動津液即以烏梅酸收配之瘥家多

蓄痰涎黃水非恒山不能上涌而此既用恒山復用蜀漆得無過猛之慮猶賴暗藏白虎等藥於中可以保安無艾

烏梅丸

治寒熱勞瘧形體羸瘦痰結胸中食飲

減少或因行遠久經勞役患之積年不瘥方

烏梅肉

豆豉

各一合

升麻

地骨皮

柴胡

前胡

鱉甲

恒山

各一兩

肉蓯蓉

元參

百合

蜀漆

人參

知母

桂心

各半兩



桃仁 八十枚

右十六味為末蜜丸空心煎細茶下三十九二服  
老少孩童量力通用無所忌

衍義烏梅丸亦主勞瘧證雖新久攸分逐痰清熱則一方中柴胡前胡即前方白薇之意百合即前方葳蕤麥門冬之意元參即前方石膏甘艸之意瘧久脾腎兩虧非人參不能助長藥力非菴蓉不除勞傷寒熱寒熱積久肝血受傷則桂心桃仁又所必需耳

治勞瘧積時不斷眾治無效方

生長大牛膝一握切以水六升煮取二升分再服第一服取未發前食頃第二服取臨發時

衍義勞瘧積年不除諸藥罔效乃邪氣痺著於下焦因

取牛膝一味生切煮服不須復用他藥然瘧發午前病屬陽分及風瘧暴發久瘧陽虛咸非所宜不可用熟熱則補而不宣無逐濕祛邪之用也

大五補湯 治時行後變成瘧瘧方

人參 白朮 茯苓

甘艸 黃芪 乾地黃

當歸 芍藥 各三兩 芎藭



遠志

桔梗

各二兩

桂心

三十銖

竹葉

五兩

大棗

二十枚

生枸杞根

生薑

各一斤

半夏

麥冬

各一斤

右十八味咬咀以水三斗煮竹葉枸杞取二斗次內諸藥煎取六升分六服一日一夜令盡

衍義

方下所主時行後變成瘴瘧瘧則山嵐瘴氣非由變成詳方中諸藥一皆調補之味咸非治瘴之品此必瘡字誤刊瘴字亥豕相似之故耳

鯪鯉湯 治乍寒乍熱乍有乍無山瘴瘧方

鯪鯉甲

十四枚

鱉甲

烏鰂骨

各一兩

恒山

三兩

附子

一枚

右五味咬咀以酒三升漬一夕發前稍稍啜飲勿絕吐之兼以塗身斷食過時乃食飲

衍義

時行瘴癘之氣不犯陽明濕土而傷風木之經所以寒熱不時非若尋常瘧發之有常期也瘧邪既犯厥陰故取專走肝經血肉之味兼附子通行經脈之力鼓舞恒山迅掃痰涎一涌而瀆散無餘瘧瘧之金錐無愈於斯也

烏梅丸

治肝邪熱為瘧令人顏色蒼蒼氣息喘悶戰掉狀如死者或久熱勞微動如瘧積年不



瘥方

烏梅肉

蜀漆

驚甲

葳蕤

知母

苦參

恒山一兩

石膏二兩

香豉一合

甘艸

細辛各十

右十一味為末蜜丸如梧子大酒服十九日再飲服亦得

治心熱為瘧不止或止後熱不歇乍來乍去令人

煩心甚欲飲清水反寒多不甚熱者方

甘艸一兩

蜀漆三兩

恒山

驚甲各四兩

石膏五兩

香豉一合

梔子

烏梅各三十枚

淡竹葉切二升

右九味咬咀以水九升煮取三升分三服

恒山丸 治脾熱為瘧或渴或不渴熱氣內傷不

泄令人病寒腹中痛腸中鳴汗出方

恒山三兩

甘艸半兩

知母

驚甲各一兩

右四味為末蜜丸如梧子大未發前酒服十九臨

發時一服正發時一服

恒山湯 治肺熱痰聚胸中來去不定轉而為瘧



其狀令人心寒寒甚則發熱熱間則善驚如有  
所見者方

恒山 三兩

甘艸 半兩

秫米 三百二十粒

右三味咬咀以水七升煮取三升分三服至發時  
令三服盡

又方 治腎熱發為瘧令人淒淒然腰脊痛宛轉

大便難目眴眴然身掉不定手足寒方

恒山 三兩

烏梅 三七枚

竹葉 切一升

香豉 八合

葱白 一握

右五味咬咀以水九升煮取三升分三服至發令

盡

衍義

五臟之瘧皆在於經而諸經見證雖各不同其主

治之用總以恒山蜀漆為破的之金錒其熱在於

肝令人顏色蒼蒼又須烏梅鱉甲為引以收耗散

之陰 熱在於心令人煩心欲飲清水又須竹葉

梔子為引以清發渴之熱 熱在於脾令人腹痛

腸鳴又須甘艸為引以滋燥竭之土 熱在於肺

令人痰聚胸中去來不定又須秫米為引以護傷

殘之氣 熱在於腎令人淒淒然腰脊痛目眴眴

然又須葱白香豉以發內陷之邪



藜蘆丸 五臟並有瘧候六腑則無獨胃腑有之  
胃腑瘧者令人旦病也善飢而不能食食而支  
滿腹大治之方

藜蘆 恒山 皂莢

牛膝 各一兩 巴豆 三枚

右五味先熬藜蘆皂莢色黃合搗為末蜜和丸如

小豆大旦服一九正發時一九一日勿飽食 肘後無恒

山牛膝

衍義

六腑之瘧多見經證純屬於腑者惟胃腑有之故  
證見善飢不欲食腹支滿則為胃腑受病之候又

須皂莢佐藜蘆以上涌牛膝引巴豆以下奪腑實  
之病與經熱不同非極力峻攻不能豁然取效

刺灸法

肝瘧刺足厥陰見血 心瘧刺手少陰

脾瘧刺足太陰 肺瘧刺手太陰陽明

腎瘧刺足少陰太陽 胃瘧刺足太陰陽明橫脈

出血

凡灸瘧必先問其病之所發者先灸之從頭項發者  
於未發前預灸大椎尖頭漸灸過時止從腰脊發者  
灸腎臑百壯從手臂發者灸三間



癰灸上星及大椎至發時令滿百壯灸艾炷如黍米粒俗人不解取穴務大炷也

覺小異卽灸百會七壯若後更發又七壯極難愈者不過三灸以足踏地以線圍足一匝中折從大椎向百會灸線頭三七壯炷如小豆狀 又灸風池二穴三壯

凡一切癰無問遠近正仰臥以線量兩乳間中屈從乳向下灸度頭隨年壯男左女右

五臟一切諸癰灸尺澤七壯穴在肘中約上動脈是也 諸癰血脈不見者刺十指間出血血去必已先

視身之赤如小豆者盡取之 癰刺足少陰血出愈

瘡癰上星主之穴在鼻中央直髮際一寸陷客豆

是也灸七壯先取諛諛後取天牖風池 瘡日西而

發者臨泣主之穴在目眥上入髮際五分陷者灸七

壯 瘡實則腰背痛虛則歛衄飛揚主之穴在外踝

上七寸灸七壯 瘡多汗腰痛不能俛仰目如脫項

如拔崑崙主之穴在足外踝後跟骨上陷中灸三壯

襪瘡法 未發前把大雄雞一頭著懷中時時驚動

令雞作聲立瘥

治瘡符



癩小兒父字石拔母字石鎚某甲著患人姓名患癩人竊讀之曰一切天地山水城隍日月五星皆敬竈君今有一癩鬼小兒罵竈君作黑面奴若當不信看文書急急如律令

右件符必須真書前後各畱白紙一行擬著竈君額上瓦石壓之不得壓字上勿令人近符若得專遣一人看符大好亦勿令灰土傳符上致使字不分明出見著符次第如後若明日日出後發須令人夜掃竈君前及額上令淨至發日旦令患人整衣帽立竈前讀符使人自讀必須分明讀符勿錯

一字每一徧若別讀人一遍患人跪一拜又以手捉患人一度若患人自讀自捉衣振云人姓某甲如此是凡三徧讀三拜了以淨瓦石壓兩角字向上著竈額上勿令壓字上若癩日西發具如上法三徧讀符至午時更三徧讀如上法如夜發日暮更三徧讀並如上法其竈作食亦得勿使動此符若有露地竈屋裏竈上著止有露竈依法著之仍須手捉符其符法如後若有客患會須客經停過三度發三度委曲著符如上法符亦云客姓名患癩乞拘錄癩鬼小兒如左凡治久患者一著符一



漸瘥亦可五度著符如始可全瘥又須手把符如左

王良符張季伯書之急急如律令

右王良符依法長捲兩手握念佛端坐如須行動檢校插著胸前字頭向上

右二符各依法一時用不得闕一符萬一不瘥但得一發輕後發日更讀卽瘥一一仔細依法若字參差卽不瘥

診谿毒證第十六

江東江南諸溪源間有蟲名短狐溪毒亦名射工其

蟲無目而利耳能聽在山源溪水中聞人聲便以口中毒射人故謂射工也其蟲小毒輕者及相逐者射著人影者皆不卽作瘡先病寒熱身不喜冷體強筋急頭痛目疼張口欠咳嗽呼吸悶亂朝旦少蘇醒哺夕輒復寒熱或似傷寒發石散動亦如中尸使不能語病候如此自非其土地人不常數行山水中不知其證便謂是傷寒發石散動作治乖僻毒盛發瘡復疑是癰疽乃至吐下去血復恐疑蠱毒是以致禍耳今說其狀類以明其證與傷寒別也方見二十五卷備急篇中



